

07 SEP 2001

LAWATAN PM THAI UNTUK BERI SOKONGAN MORAL KEPADA KONTINJEN SUKAN SEA

KUALA LUMPUR, 7 Sept (Bernama) -- Perdana Menteri Thailand Thaksin Shinawatra akan melakukan lawatan sehari ke Malaysia esok bagi menghadiri upacara perasmian Sukan SEA ke-21 di sini.

Menurut kenyataan Kementerian Luar, lawatan itu atas jemputan Perdana Menteri Datuk Seri Dr Mahathir Mohamad adalah juga bagi memberikan sokongan moral kepada kontinjen Thailand ke Sukan SEA serta kepada Malaysia selaku tuan rumah sukan itu.

Thaksin akan diiringi oleh Menteri Perdagangan Thailand dan lapan pegawai kerajaan.

Beliau dijangka akan mengunjungi Dr Mahathir di Putrajaya dan kedua-dua pemimpin itu dijangka akan membincangkan isu-isu kepentingan bersama.

Lawatan itu dijangka akan memperkukuhkan lagi hubungan setiakawan dan kerjasama yang sedia terjalin antara Malaysia dan Thailand, menurut kenyataan itu.

Ia juga merupakan manifestasi akan pentingnya hubungan antara Thailand dan Malaysia, menurut kenyataan itu.

Thaksin melawat Malaysia pada 24 April tahun ini, lawatan pertamanya ke negara anggota Asean sejak memegang jawatan itu.

-- BERNAMA

ZAI ES RHM